

Fjala përshëndetëse (në emër të Kryesisë së ASHSH)

E nderuar Kryetare e Akademisë së Shkencave dhe Arteve të Kosovës, akad. Justina Shiroka Pula,

I nderuar Kryeministër z. Albin Kurti

Të nderuar akademike dhe akademikë të Akademisë së Shkencave dhe të Arteve të Kosovës, të nderuar familjarë, kolegë, miq dhe pjesëmarrës,

Në emër të Kryesisë së ASHSH, të Asamblesë së saj, e tërë komunitetit shkencor në Shqipëri kam nderin dh enjëkohësisht me dhimbje të thellë, tju përcjell ngushëllimet tona për ndarjen nga jeta të akademikut Rexhep Qosja — një prej figurave më të shquara të mendimit shkencor, letrar dhe kombëtar shqiptar.

Akademik Rexhep Qosja ishte një, erudit i rrallë, një personalitet i jashtëzakonshëm i kulturës mbarëshqiptare, studiues i përkushtuar dhe shkrimtar i mirënjohur. Jeta dhe vepra e tij janë të lidhura pazgjidhshmërisht me historinë e mendimit shkencor, letrar dhe politik të botës shqiptare. Për më shumë se gjysmë shekulli, ai ishte një zë i fuqishëm në jetën intelektuale dhe publike, duke u shndërruar në një nga figurat më përfaqësuese të vetëdijes sonë kombëtare.

Ai njihet gjerësisht si një nga zërat më të fortë në debatet publike shqiptare, duke trajtuar me guxim dhe përgjegjësi çështje themelore të identitetit kombëtar, historisë, kulturës dhe zhvillimeve politike në Kosovë e Shqipëri. Angazhimi i tij qytetar dhe atdhetar për demokracinë, shtetin ligjor dhe marrëdhëniet ndërshqiptare u shpreh përmes një veprimtarie të gjerë studimore e publicistike.

Si drejtues i Institutit Albanologjik të Prishtinës, prof. Rexhep Qosja kontribuoi ndjeshëm në zhvillimin e albanologjisë dhe në artikulumin e ideve për liri, pavarësi dhe identitet kulturor. Njëkohësisht profesor në Universitetin e Prishtinës dhe anëtar i Akademisë së Shkencave dhe të Arteve të Kosovës, ai u shqua ndër dekada si një nga studiuesit më të rëndësishëm të historisë së letërsisë shqipe dhe të kritikës moderne, duke dhënë një kontribut të vyer në jetën akademike dhe në zhvillimin e kërkimit shkencor.

Po aq e rëndësishme është edhe krijimtaria e tij letrare, e cila dëshmon për një romancier, eseist me ndjeshmëri të thellë artistike dhe vizion modern, ku trajtohen në mënyrë shumëdimensionale temat kombëtare dhe shoqërore.

Angazhimi i tij në çështjen kombëtare dhe në afirmimin ndërkombëtar të Kosovës është i pashembullt. Pjesëmarrja në Konferencën e Rambouillet, si anëtar i delegacionit shqiptar, si dhe roli i tij në argumentimin dhe përfaqësimin e qëndrimeve shqiptare në një moment vendimtar historik, dëshmojnë për kontributin e tij të drejtpërdrejtë në proceset që përcaktuan zhvillimet e mëtejshme për lirinë dhe pavarësinë e Kosovës.

Në vlerësim të këtij kontributi kolosal, ASHSH ka patur nderin ta zgjedhë antarë të jashtëm të saj, si shenjë mirënjohje për rolin e ndikimin e tij të shquar në zhvillimin e shkencës, dijes e të kulturës në Shqipëri.

Në këto momente humbje të pazëvendësueshme, ne ndajmë dhimbjen me familjen e tij, me kolegët dhe me gjithë komunitetin akademik e kulturor në Kosovë e më gjerë. Kujtimi, vepra dhe kontributi i akademik Rexhep Qosjes do të mbeten të përhershme në fondin e kulturës dhe të shkencës shqiptare dhe në ndërgjegjen kolektive të kombit tonë.

Ju lutem pranoni ngushëllimet më të sinqerta të Kryetarit të ASHSH, Akad. Skënder Gjinushi, Kryesisë, si dhe të Asamblesë së ASHSH.

Të paharruara qofshin vepra e kujtimi i Akademik Rexhep Qosjes.